

hujus Indicis prohibitionem, libros aliquos legere, aut habere.

Quod si quis libros Hæreticorum, vel cujusvis anctoris scripta, ob hæresim, vel ob falsi dogmatis suspicionem damnata, atque prohibita legerit, sive habuerit, statim in excommunicationis sententiam incurrat.

Qui vero libros alio nomine interdictos legerit, aut habuerit, præter peccati mortalis reatum, quo afficitur iudicio Episcoporum severe puniatur.

## OBSERVATIONES

AD REGULAM QUARTAM ET NONAM

### CLEMENTIS PAPAE VIII.

JUSSU FACTÆ

Circa quartam Regulam.

*Animadvertendum est circa suprascriptam quartam Regulam Indicis fel. rec. Pii Papae IV. nullam per hanc impressionem, et editionem de novo tribui facultatem Episcopis, vel Inquisitoribus, aut Regularium Superioribus, concedendi licentiam emendi, legendi, aut retinendi Biblia vulgari lingua edita, cum hactenus mandato, et usu sanctae Romanae, et universalis Inquisitionis sublata eis fuerit facultas concedendi hujusmodi licentias legendi, vel retinendi Biblia vulgaria, aut alius sacrae Scripturae, tum novi, quam veteris Testamenti partes, quavis vulgari lingua editas.*

#### ADDITIO

Quod si hujusmodi Bibliorum versiones vulgari lingua fuerint ab Apostolica Sede approbatæ, aut editæ cum annotationibus desumptis ex sanctis Ecclesiae Patribus, vel ex doctis, catholicisque viris, concedantur. *Decr. Sacr. Congregationis Ind. 13. Junii 1757.*

## Circa nonam Regulam.

**C**irca Regulam nonam ejusdem Indicis ab Episcopis, et Inquisitoribus Christifideles sedulo admonendi sunt, quod in legentes, aut retinentes contra Regulam hanc libros hujusmodi Astrologiae judiciariae, divinationum, et sortilegiorum, rerumque aliarum in eadem Regula expressarum, procedi potest, non modo per ipsos Episcopos, Ordinarios, sed etiam per Inquisitores locorum, ex Constit. fel. rec. Sixti Papae Quinti contra exercentes Astrologiae judiciariae artem, et alia quaecumque divinationum genera, librosque de eis legentes, ac tenentes, promulgata, sub Dat. Romae apud Sanctum Petrum, Anno Incarnat. Dom. M. D. LXXXV. Nonis Januarii, Pontificatus sui Anno primo.

## De Thalmud, et aliis libris Hæbreorum.

**Q**uamvis in Indice praedicti Pii Papae Quarti Thalmud Hæbreorum, ejusque glossæ, annotationes, interpretationes, et expositiones omnes prohibeantur, sed quod, si absque nomine Thalmud, et sine injuriis, et calumniis in Religionem Christianam aliquando prodissent, tolerarentur: quia tamen Sanctissimus Dominus Noster Dominus Clemens Papa VIII. per suam Constitutionem contra impia scripta, et libros Hæbraeorum sub Dat. Romae apud Sanctum Petrum Anno Incarnat. Dom. M. D. XCII. pridie Kal. Martii. Pontificatus sui Anno secundo, illos prohibuit, atque damnavit: mens ipsius non est, eos propterea ullatenus etiam sub illis conditionibus permittendi, aut tolerandi; sed specialiter: et expresse statuit, et vult, ut hujusmodi impii Thalmudici, Cabalistici, aliique nefarii Hæbraeorum libri omnino damnati, et prohibiti maneant, et censeantur; atque super eis, et aliis libris hujusmodi praedictae Constitutio perpetuo; et inviolabiliter observetur.

## De Libro Magazor.

**A**d haec sciant Episcopi, Ordinarii, et Inquisitores locorum, librum Magazor Hæbraeorum, qui continet partem officiorum; et caeremoniarum ipsorum, et Synagogae, Lusitanica, Hispanica, Gallica, Germanica, Italica, aut quavis alia vulgari lingua, praeterquam Hæbraea, editum, jamdiu ex speciali decreto rationabiliter prohibitum esse. Idcirco provideant, illum nullatenus permitti, aut tolerari debere, nisi Hæbraica lingua praedicta.